

বিদেশি না এলেও হবে আইএসএল

এই সময়: কোভিড পরিস্থিতির উন্নতি হওয়া তো দূর অস্ত, দিনের পর দিন খারাপ হচ্ছে সারা ভারত জুড়ে। তার মধ্যেই কিন্তু নতুন ফুটবল মরসুমের দামামা বাজিয়ে দিলেন এআইএফএফ সচিব কুশল দাস।

সোমবার বেঙ্গল চেম্বার অফ কমার্সের ওয়েবিনারে ফেডারেশনের সিনিয়র ভাইস প্রেসিডেন্ট সুব্রত দত্তের সঙ্গে হাজির ছিলেন কুশল দাস। সেখানেই তিনি বলেন, 'আমরা অগস্টের শুরুতেই অনূর্ধ্ব ১৭ মেয়েদের জাতীয় শিবির শুরু করতে চাইছি। তারপর সিনিয়র ছেলেদের

জাতীয় শিবির।' কোথায় হবে এই দুই শিবির? কুশলের জবাব, 'মেয়েদের শিবির হওয়ার বেশি সম্ভাবনা ঝাড়খণ্ডে। সেখানকার মুখ্যমন্ত্রী হেমন্ত সোরেন নিজে এই শিবির করতে আগ্রহ দেখিয়েছেন। কারণ ভারতীয় শিবিরে ৮-১০জন ঝাড়খণ্ডের মেয়ে রয়েছে। আমরা এই শিবির গোয়ায় করার জন্যও সেখানকার সরকারের সঙ্গে আলোচনা করছি।' প্রি ওয়ার্ল্ড কাপে ভারতের ম্যাচ রয়েছে অক্টোবর-নভেম্বরে কাতার ও আফগানিস্তানের সঙ্গে। তাই এ জন্য সিনিয়র ভারতীয় টিমের শিবির ডুবনেশ্বরে হওয়ার কথা।

কুশল জানিয়েছেন, পরিস্থিতি খুব খারাপ হলে পরের বছর মেয়েদের বিশ্বকাপ হবে ফাঁকা গ্যালারিতে। তাঁর কথায়, 'এ বছর করোনার জন্য বিশ্বকাপ পিছিয়ে পরের বছর ফেব্রুয়ারিতে তা করবে ফিফা। যদি অবস্থা ভালো না হয়, তাহলে বিশ্বকাপের ম্যাচও ক্লোজড ডোরে হবে।'

সেপ্টেম্বরের মাঝামাঝি ফেডারেশন নতুন মরসুম শুরু করতে চাইছে দ্বিতীয় ডিভিশন আই লিগ দিয়ে। সচিব পরিষ্কার জানিয়ে দিয়েছেন, দ্বিতীয় ডিভিশন আই লিগ, আইএসএস এ বার সবকিছুই করা হবে। তবে তা

হয়তো ফর্ম্যাট বদলে। তাঁর কথায়, 'কোভিডের জন্য যদি ভারত সরকার দেশে বিদেশি খেলানোর অনুমতি না দেয়, তাহলেও আমরা টুর্নামেন্ট চালু রাখব। সে ক্ষেত্রে স্থানীয় ফুটবলারদের নিয়েই খেলতে হবে টিমগুলোকে।' আই লিগ ও আইএসএল এ বার সিঙ্গেল লিগ হওয়ারই সম্ভাবনা। তাঁর জন্য একটি ভেন্যুকেই বেছে নেওয়ার ভাবনা ফেডারেশনের। আইএসএলের সব ম্যাচই হতে পারে গোয়ায়। আই লিগ হওয়ার সম্ভাবনা কলকাতায়। তবে এখনও এ ব্যাপারে কোনও কিছুই চূড়ান্ত হয়নি বলে জানিয়েছেন কুশল।